

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA KAKANJ  
Općinsko vijeće**

**Broj:** 01/1-24-Z/18

**Kakanj,** 29.11.2018. godine

**Z A P I S N I K**

**sa 24. redovne sjednice Općinskog vijeća održane 29.11.2018. godine (utorak) u velikoj sali za  
sastanke Općinskog vijeća sa početkom u 9:00 sati  
(sažetak zapisnika)**

Nakon intoniranja himne Bosne i Hercegovine, 24. sjednicu Općinskog vijeća otvorio je Slaven Katičić, predsjedavajući Općinskog vijeća i pozdravio prisutne.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Džemal Bećirhodžić, Aldin Šljivo, Edin Aliefendić, Mejrema Purišević, Izudin Hrusto, Adnan Ibrahimspahić, Amar Selimović, Safet Šahman, Nadina Kovač i Senad Alajbegović (**SDA**)

Jasmin Mušanović, Semir Mušija, Mirnes Merdić, Mugdin Gorak i Rizah Haračić (**SBB BiH**)

Fahrudin Buza, Adisa Škulj, Zerina Kovač, Mirsad Tursum i Rešad Merdić (naknadno pristupio) (**S BiH**)

Enes Piljug, Ahmed Begić i Eldin Mioč (**SDP BiH**)

Slaven Katičić i Ivica Petrović (**HDZ BiH**)

Elvedin Delić (naknadno pristupio) (**A-SDA**)

Nusret Muslić (**samostalni vijećnik**)

**Odsutni vijećnici:** Muhamed Kubat (**SDA**), Mujo Fafulić (**nacionalna manjina**) i Sedmedin Amidžić (**DF**) - ostavka

Predsjedavajući je konstatovao da je na sjednici u momentu prijave prisutno 25 vijećnika i vijećnica, te da su se stekli svi potrebni uvjeti za validan rad i odlučivanje Općinskog vijeća.

Pored vijećnika sjednici su prisustvovali:

**Nermin Mandra**, općinski načelnik

**Ferdo Mijač**, sekretar Općinskog vijeća

**Mirza Fazlić**, pomoćnik općinskog načelnika za privredu, urbanizam i zaštitu okoline

**Džihad Berbić**, pomoćnik općinskog načelnika za finansije

**Rešad Zaimović**, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

**Nurčo Kurtović**, pomoćnik općinskog načelnika za imovinsko-pravne, geodetske poslove i katastar nekretnina

**Nurudin Hrusto**, pomoćnik općinskog načelnika za civilnu zaštitu

**Bahrudin Arnaut**, pomoćnik općinskog načelnika za opću upravu, radne i zajedničke poslove, lokalnu samoupravu i mjesne zajednice

**Zijad Neimarlija**, direktor Zavoda za planiranje i izgradnju općine Kakanj

**Enver Kusić**, sekretar organa uprave

**Izjavioci, obrađivači, gosti:**

Sead Imamović, Iso Zaimović, Sejad Zaimović, Vahidin Topalović, Izudin Neimarlija, Almedin Trako,

Branimir Muidža, Mirnes Bašić, Mirza Zaimović, Haris Veispahić, Enver Merdić, Mirnes Bajtarević, Fakir Ajdinović, paroh Dragiša Cvjetković, Eniz Čurić, Omer Odobašić i Tahir Mandžuka.

### Predstavnici medija:

NTV IC Kakanj  
Radio Kakanj  
„Kakanjske novine“

„Naša riječ“  
„Kakanjlive“  
„Kakanj-x“

„Kaportal“  
„Klix portal“

Kratka saopćenja o radu sjednice i prethodnim pitanjima:

Kolegij Općinskog vijeća je 21.11.2018. godine, održao 24. sjednicu na kojoj je razmatrao:

**a) Zahtjev za davanje saglasnosti Općinskog vijeća za provođenje postupka dodjele koncesije**

Kolegij je navedeni zahtjev zaključkom prosljedio na dalje postupanje Službi za privredu, urbanizam i zaštitu okoline i svim mjesnim zajednicama u slivu Trstionice.

**b) Zahtjev MZ Kakanj I za uređenje parking prostora iza zgrade Veterinarske stanice**

Kolegij je navedeni zahtjev zaključkom prosljedio na dalje postupanje Službi za privredu, urbanizam i zaštitu okoline i Zavodu za planiranje i izgradnju uz preporuku da se navedeni prostor uredi prema zahtjevu građana.

**c) Zahtjev mještana MZ Ričica za formiranje nove mjesne zajednice Gornja Ričica**

Kolegij je navedeni zahtjev zaključkom prosljedio na dalje postupanje Službi za opću upravu, radne i zajedničke poslove, lokalnu samoupravu i mjesne zajednice

**d) Zahtjev grupe građana za rješavanje putne infrastrukture iznad stadiona Rudara**

Kolegij je navedeni zahtjev zaključkom prosljedio na dalje postupanje Službi za privredu, urbanizam i zaštitu okoline.

**e) Vijećnička inicijativa vijećnika Safeta Šahmana**

Kolegij je inicijativu primio k znanju.

**f) Odgovor Službe za imovinskopravne, geodetske poslove i katastar nekretnina na Molbu Hafize Zaimović**

Kolegij je odgovor primio k znanju te isti prosljedio imenovanoj.

### Usvajanje zapisnika sa 23. sjednice Općinskog vijeća:

**Enes Piljug:** je rekao da se u zapisniku ne nalazi vijećničko pitanje koje je postavio na sjednici, te je zatražio da se u tom dijelu zapisnik dopuni.

Predsjedavajući je zapisnik sa 23. sjednice Općinskog vijeća, uz primjedbu da se isti dopuni u skladu s primjedbom vijećnika Piljuga stavio na glasanje, te je isti usvojen sa 24 glasa za, bez glasova protiv i uzdržan.

### Komentari na dostavljene odgovore na vijećnička pitanja:

**Rizah Haračić:** je rekao da je dobio odgovor na pitanje o utrošku sredstva za MZ Dumanac na projektu izgradnje rasvjete, te da se radi postavljanju rasvjete u samo jednoj podružnici, što za njega nije prihvatljivo. Smatra da bi se taj posao trebao obaviti za glavnu trasu kroz MZ Dumanac koju svi koriste, a ne za pojedine ogranke.

**Enes Piljug:** je istakao da je zadovoljan odgovorom na pitanje o legalnosti odloženog otpada uz rijeku Ribnicu. Ističe da njemu nije toliko bitno ko je počinitelj i to prepušta nadležnim inspekcijama da utvrde, ali insistira da se taj otpad ukloni, kako bi se obala i korito rijeke vratili u nekadašnje stanje.

### Komentari na dostavljena mišljenja na vijećničke inicijative:

**Safet Šahman:** je rekao da nije dobio odgovor na inicijativu upućenu Općini da se organizuje sastanak predstavnika privrednih subjekata koji posluju u dolini rijeke Ribnice i predstavnika MZ koje se nalaze na području Brnjica. Insistira da se taj sastanak što prije organizuje, a vezano za potpisani sporazum koji nije prihvaćen od strane RMU Kakanj.

**Rizah Haračić:** je rekao da je dobio odgovor na vijećničku inicijativu podnesenu za izgradnju puta za MZ Bičer i MZ Povezice paralelno uz auto-put. U odgovoru se navodi da postoji sudski spor oko tog puta, obzirom da „BH Gas“ nije dao saglasnost za tu trasu puta, pa se upućuje na pravobranilaštvo radi informacije u kojoj je fazi rješavanje spora. Zatražio je da dobije informaciju u kojoj je fazi rješavanje spora, te da se pokušaju izvršiti dodatni pritisci na „BH Gas“ da se dobije potrebna saglasnost.

**Enes Piljug:** je kazao da je djelimično zadovoljan prispjelim odgovorom na inicijativu sa 22. sjednice OV, a gdje se radi o asfaltiraju dvije dionice puta, prva od O.Š u Rošćevini do kraja Popara i druga do skretanja za Sopotnicu do Gornje Jehovine. U odgovoru se kaže da je dio zemljišta kojim prolazi trasa puta u vlasništvu „Željeznica F BiH“, te da se služba obratila istima za rješavanje imovinskih odnosa radi izgradnje puta, ali je nezadovoljan zbog činjenice da se to nije uradilo ranije, obzirom da se znalo kakvi su vlasničko-pravni odnosi. Na vijećničku inicijativu sa prethodne sjednice, da se uradi i asfaltira put od Džamije u Popima do mjesta Rivišće u dužini od 350m, je dobio odgovor Zavoda da će predmetni projekat biti uvršten u neki od programa za realizaciju u 2019. godini, što je u skladu sa njegovom inicijativom.

### **Vijećnička pitanja:**

**Enes Piljug:** je postavio dva vijećnička pitanja i to šta je razlog i zbog čega se ne rekonstruiše put od Malješa (cementarskog mosta) do kraja naselja Pope, te hoće li RMU Kakanj izvršiti postavljanje panela (bukobrana) na pretovarnom sistemu u Karaolskom polju.

**Semir Mušija:** je postavio dva vijećnička pitanja. Prvo, kada će biti realizovan projekat rekonstrukcije ulice od Zelene pijace do novoizgrađenog objekta Hotel Kakanj, te drugo u kojoj su fazi realizacije projekti usvojeni od strane Općinskog vijeća Programom utroška neraspoređenog dijela namjenskih sredstava od prihoda preduzeća ostvarenih radom termoelektrana za 2018. godinu i sredstava od prodaje poslovnih prostora i zemljišta.

**Rizah Haračić:** je tražio da dobije informaciju o rješavanju spornog puta iznad stadiona FK „Rudar“ Kakanj.

**Rešad Merdić:** je postavio vijećničko pitanje u vezi zloupotrebe parking prostora predviđenog za osobe sa invaliditetom. Tražio je od Policijske stanice Kakanj da dobije podatak koliko je izdato znakova o pristupačnosti, te da li se i kako sankcionišu osobe koje neovlašteno koriste ta parking mjesta.

**Ivica Petrović:** je tražio pismeni odgovor na pitanje da li se poštuje odluka Općinskog vijeća o isplati plaća u Općini Kakanj u visini od 70% od prosjeka u Federaciji BiH.

Predsjedavajući je konstatovao da je vijećnik Mirnes Merdić iskoristio pravo na vijećničko pitanje bez korištenja govornice.

### **Vijećničke inicijative:**

**Rizah Haračić:** je podnio dvije vijećničke inicijative i to da se izvrši rekonstrukcija mosta „Crna rijeka, iz bezbjednosnih razloga, a druga se odnosi na rješavanje problema parking prostora na u užem području općine Kakanj, odnosno od mosta „Mladih“ do mosta na „Crnoj rijeci“.

**Fahrudin Buza:** je podnio inicijativu da se u Budžetu Općine za 2019. godinu, predvide sredstva za proširenje puta i izgradnju trotoara u ulici 1. maj i to neposredno iza spajanja sa ulicom Alije Izetbegovića, u pravcu naselja Bare, odnosno na lokaciji ranije radnje „Foto Kubura“ i diskoteke „Ara“.

**Semir Mušija:** je uputio dvije vijećničke inicijative, prva da se u narednoj godine planira i realizuje projekat dodatnog osvijetljavanja pješačkih prelaza u Kaknju i to na potezu od pješačkog prelaza kod Mosta mladih do pješačkih prelaza kod bivšeg objekta „Košpa“ i druga da se u zimskom periodu pokuša iznaći mogućnost postavljanja ledene plohe za klizanje, na platou ispred caffe bar „Evropa“.

**Enes Piljug:** je podnio vijećničku inicijativu da se u mjestu Tičići uradi javna rasvjeta za koju postoji projektna dokumentacija.

**Safet Šahman:** je podnio dvije vijećničke inicijative. Prva da JP „Vodokom“ do naredne sjednice Općinskog vijeća predloži rješenje u oko načina odvoza smeća sa područja MZ Krševac, MZ Brnjic, MZ Dubovo brdo i MZ Starposle, a druga da se sredstva od koncesionih naknada, oprihodovana od koncesionara RMU „Kakanj“, TC „Kakanj“ i „Trgošped“, troše isključivo na infrastrukturne projekte.

**Amar Selimović:** je podnio vijećničku inicijativu da se izvrši posao asfaltiranja dijela puta u MZ Podgora i to dio puta od mosta do pružnog prelaza.

**Izudin Hrusto:** je podnio dvije vijećničke inicijative, prva da se u Ulici branilaca postave saobraćajna ogledala i to na mjestima gdje se vrši uključenje na tu ulicu iz pravca ulice Alije Izetbegovića, te druga da se riješi problem pasa lotalica, prije svega na depou TE Kakanj, a onda i na ostalim područjima u općini gdje se isti pojavljuju.

**Jasmin Mušanović:** je podnio vijećničku inicijativu da se u Budžetu Općine za 2019. godinu, predvide sredstva za kupovinu školskog pribora i lanč paketa za djecu koja idu u školu, a spadaju u kategoriju djece (porodica) slabijeg imovinskog stanja.

### **Utvrđivanje dnevnog reda:**

Predsjedavajući je predložio dnevni red koji je usaglašen na sjednici Kolegija 21.11.2018.godine, te je predložio da se u dnevni red uvrste naknadno pristigli materijali i to materijali Komisije za izbor u regulirane organe, koja je dostavila prijedloge rješenja za imenovanje članova NO i UO JU Centar za socijalni rad Kakanj, kao i da se u dnevni red uvrsti i odluka o izboru vršioca dužnosti općinskog načelnika.

**Semir Mušija:** je rekao da je klub SBB-a saglasan sa uvrštavanjem tačke izbor vršioca dužnosti općinskog načelnika, ali da nije saglasan da sa materijali Komisije za izbor u regulirane organe uvrste u dnevni red. To iz razloga sve češće pojave naknadnog dostavljanja materijala i dopunjavanja dnevnog reda na samoj sjednici, te iz razloga formalnih manjkavosti u samim prijedlozima akata, jer smatra da Općinsko vijeće prema zakonskim odredbama nije nadležno za donošenje predmetnih akata, nego općinski načelnik.

Predsjedavajući je dao pauzu od 5 minuta.

Predsjedavajući je predložio da se vijećnici izjasne da li će dvije od tri dodatno predložene tačke biti uvrštene u dnevni red, a radi se o prijedlozima rješenja za imenovanje članova NO i UO JU Centar za socijalni rad Kakanj.

Vijeće je sa 18 glasova za, 8 protiv i 1 glas uzdržan, prihvatilo da se u dnevni red uvrste tačke o imenovanju članova NO i UO JU Centar za socijalni rad Kakanj.

Predsjedavajući je predložio novi, dopunjeni dnevni red od 9 tačaka.

U raspravi o predloženom dnevnom redu nije niko učestvovao, te je Vijeće sa 18 glasova za, 8 protiv i 1 uzdržan, usvojilo dnevni red za 24. sjednicu.

### **Usvojeni dnevni red:**

1. Izvještaj o izvršenju Budžeta Općine Kakanj za period 01.01-30.09.2018. godine
2. Nacrt budžeta Općine Kakanj za 2019. godinu
3. Nacrt odluke o izvršavanju budžeta Općine Kakanj za 2019. godinu
4. Prijedlog odluke o načinu i uvjetima raspolaganja nekretninama – prodaji neposrednom pogodbom zemljišta
5. Prijedlog odluke o prenosu prava upravljanja, korištenja i održavanja izgrađene sportske dvorane u Kakanju
6. Informacija o stanju u osnovnim i srednjim školama na području općine Kakanj na kraju prethodne i početku nove školske 2018/19
7. Prijedlog rješenja o konačnom imenovanju Upravnog odbora JU Centar za socijalni rad Kakanj

8. Prijedlog rješenja o konačnom imenovanju Nadzornog odbora JU Centar za socijalni rad Kakanj
9. Izbor vršioca dužnosti općinskog načelnika

## **1. Tačka**

### **Izveštaj o izvršenju Budžeta Općine Kakanj za period 01.01-30.09.2018. godine**

Predlagač: Općinski načelnik  
Obrađivač: Služba za finansije  
Izjavitelj: Džihad Berbić, pomoćnik općinskog načelnika

U diskusiji nije niko učestvovao i Vijeće je Izveštaj o izvršenju Budžeta Općine Kakanj za period 01.01-30.09.2018. godine, usvojilo sa 18 glasova za, 8 protiv i 1 uzdržan.

## **2. Tačka**

### **Nacrt budžeta Općine Kakanj za 2019. godinu**

Predlagač: Općinski načelnik  
Obrađivač: Služba za finansije  
Izjavitelj: Džihad Berbić, pomoćnik općinskog načelnika

U diskusiji su učestvovali Semir Mušija, Rizah Haračić i Ivica Petrović.

**Semir Mušija:** je rekao da se podaci u Nacrtu budžeta za 2019. godinu i to iznosi u koloni Budžet 2018. godina, ne slažu sa iznosima koji su navedeni u Odluci o izvršenju Budžeta za 2018. godinu, koja je prethodno usvojena.

Predsjedavajući je dao pauzu od 5 minuta.

**Semir Mušija:** je nakon pauze rekao da će obrađivač pojasniti sporne stavke koje su uočene u Nacrtu, te je predložio da javna rasprava po predloženom Nacrtu traje 30 dana, a ne 15 dana kako je predloženo. Još je konstatovao da je iz Nacrta evidentno da je Budžet za 2019. manji u odnosu na prethodnu godinu, te da je povećana stavka plaće zaposlenih, a da nema prikazan podatak koliko zaposlenih je planirano da bude u 2019. godini. Rekao je da je uočeno povećanje izdvajanja za sport, dok se to nije desilo sa izdvajanjima za zdravstvo, školstvo i socijalno ugrožene kategorije stanovništva.

**Džihad Berbić:** je pojasnio da je Izveštaj o izvršenju za 9 mjeseci urađen prema Budžetu koji je važio na dan 30.09., a rebalans Budžeta je usvojen 30.10., tako da je Nacrt Budžeta upoređen sa tim važećim Budžetom za 2018. godinu. Što se tiče prijedloga za produženje roka za javnu raspravu, rekao je da ostaje kod predloženih 15 dana iz razloga što službi treba vremena da obradi sve amandmane i pripremi Budžet za usvajanje do zakonom predviđenog roka. Na konstataciju da je došlo do povećanja plaća, rekao je da se ne radi o povećanju plaća nego usklađivanju istih sa kolektivnim ugovorom, kao i da postoji obaveza Općine da popuni dva radna mjesta u odjelu interne revizije, što je predviđeno u Nacrtu, te je i to razlog za povećanje predmetne stavke.

**Semir Mušija:** je napomenuo da je Vijeće početkom godine usvojilo odluku o isplati plaća zaposlenim, te da je tom prilikom rečeno da su plaće usklađene sa kolektivnim ugovorom, pa mu nije jasno o kakvom usklađivanju se sada radi.

**Rizah Haračić:** je naglasio da obrazloženje obrađivača za javnu raspravu od 15 dana je neosnovano, te da ne vidi razlog za hitnu proceduru usvajanja, obzirom da se prethodnih godina Budžet usvajao u zakonskim rokovima uz rok od 30 dana javne rasprave. Po pitanju povećanja plaća je rekao da nije saglasan sa predloženim, odnosno predlaže da se ujednače koeficijenti u svim javnim ustanovama i javnim preduzećima, kako bi došlo do povećanja svima onima kojima se plaće isplaćuju iz Budžeta.

**Džihad Berbić:** je pojasnio da se ne radi o povećanju plaća nego usklađivanju, što je zakonska obaveza, a na prijedlog da se ujednače plaće svima je rekao da se plaće u javnim ustanovama isplaćuju po općem kolektivnom ugovoru, dok se u organima uprave to vrši prema granskom

kolektivnom ugovoru, te se s toga ne može porediti jedno s drugim, niti govoriti o zajedničkom usklađivanju. Još je naglasio da rok od 15 dana za javnu raspravu ne znači da se radi o hitnoj proceduri, već o zakonskom minimalnom roku za javnu raspravu.

**Rizah Haračić:** je naglasio da Vijeće može tražiti povećanje plaća u svim javnim ustanovama bez obzira na kolektivni ugovor i naglašava da je za to da se to učini i ponovo predlaže javnu raspravu u trajanju od 30 dana, kako bi se što kvalitetnije pripremio Budžet za 2019., te ističe da nije problem ako se isti usvoji u januaru naredne godine.

**Ivica Petrović:** je rekao da nema potrebe da se istrajava na priči o povećanju plaća, kada je jasno da se radi o usklađivanju, te je naglasio da nema ništa protiv da se povećaju plaće u javnim ustanovama i preduzećima, ali da ti prijedlozi i inicijative treba da se pokrenu od nadležnih organa istih. Insitirao je da dobije pismeni odgovor na postavljeno vijećničko pitanje o isplati plaća u Općini.

**Džihad Berbić:** je ponovio da Nacrtom nije predviđeno povećanje plaća nego su one samo usklađene sa povećanjem prosječne plaće u F BiH, te da će se plaće uskladiti i na niže ukoliko dođe do pada federalnog prosjeka.

Nakon diskusije Vijeće je usvojilo zaključak o utvrđivanju Nacrta Budžeta Općine Kakanj za 2019. godinu, sa 18 glasova za, 7 protiv i 2 uzdržana. Vijeće je usvojilo i zaključak kojim se rok javne rasprave određuje u trajanju od 15 dana sa 18 glasova za, 8 protiv i 1 uzdržan.

### **3. Tačka**

#### **Nacrt odluke o izvršavanju Budžeta Općine Kakanj za 2019. godinu**

Predlagač: Općinski načelnik

Obrađivač: Služba za finansije

Izjavitelj: Džihad Berbić, pomoćnik općinskog načelnika

U diskusiji nije niko učestvovao i Vijeće je usvojilo Odluku o izvršavanju Budžeta Općine Kakanj za 2019. godinu sa 17 glasova za, 8 protiv i 1 uzdržan.

### **4. Tačka**

#### **Prijedlog odluke o načinu i uvjetima raspolaganja nekretninama – prodaji neposrednom pogodbom zemljišta**

Predlagač: Općinski načelnik

Obrađivač: Služba za imovinskoppravne, geodetske poslove i katastar nekretnina

Izjavitelj: Nurčo Kurtović, pomoćnik općinskog načelnika

U diskusiji nije niko učestvovao i Vijeće je usvojilo Odluku o načinu i uvjetima raspolaganja nekretninama – prodaji neposrednom pogodbom zemljišta sa 26 glasova za, bez glasova protiv i uzdržan.

### **5. Tačka**

#### **Prijedlog odluke o prenosu prava upravljanja, korištenja i održavanja izgrađene sportske dvorane u Kaknju**

Predlagač: Općinski načelnik

Obrađivač: Zavod za planiranje i izgradnju općine Kakanj

Izjavitelj: Zijad Neimarlija, direktor Zavoda

U diskusiji nije niko učestvovao i Vijeće je usvojilo Odluku o prenosu prava upravljanja, korištenja i održavanja izgrađene sportske dvorane u Kaknju sa 26 glasova za, bez glasova protiv i uzdržan.

### **6. Tačka**

#### **Informacija o stanju u osnovnim i srednjim školama na području općine Kakanj na kraju prethodne i početku nove školske 2018/19**

Predlagač: Općinski načelnik

Obrađivač: Služba za društvene djelatnosti, boračka pitanja, raseljena lica, izbjeglice i povratnike

Izjavitelj: Rešad Zaimović, pomoćnik općinskog načelnika

Stav i mišljenje: Komisija za mlade, Komisija za ljudska prava i ravnopravnost spolova

U diskusiji su učestvovali: Rizah Haračić, Semir Mušija i Rešad Merdić.

**Rizah Haračić:** je rekao da se iz Informacije može zaključiti da je stanje u školama zadovoljavajuće, dok smatra da to nije tako. Najbolji primjer za to je da područna škola u Čelikovini nema riješen problem sa pitkom vodom, pa je apelirao da se riješi taj problem, kao i infrastrukturni problemi u drugim školama.

**Semir Mušija:** je rekao da je pohvalno povećanje broja romske djece koja pohađaju školu, te je tražio da se izmjeni termin inkluzivnog obrazovanja koji se koristi u Informaciji. Predložio je zaključak da nadležna služba u roku od 30 dana, sačini informaciju o infrastrukturnom stanju u osnovnim i srednjim školama, aktuelnim/postojećim nerealizovanim projektima, kako bi Općinsko vijeće kroz programe planiralo određena sredstva za realizaciju istih.

**Rešad Merdić:** je rekao da je zabrinjavajuće povećanje broja izostanaka sa nastave, te je predložio da se pojača saradnja svih uključenih sa vijećem roditelja i sugerisao je da se pojačaju policijske patrole u školama prilikom večernjih sati.

Vijeće je primilo k znanju Informaciju sa 25 glasova za, bez glasova protiv i uzdržan, te je usvojilo predloženi zaključak vijećnika Mušije sa 25 glasova za, bez glasova protiv i uzdržan.

Predsjedavajući je predložio da se objedini rasprava po tačkama 7. i 8. dnevnog reda, a da se izjašnjavanje obavi pojedinačno.

## **7. Tačka**

### **Prijedlog rješenja o konačnom imenovanju Upravnog odbora JU Centar za socijalni rad Kakanj**

Predlagač: Komisija za izbor u regulirane organe

Obrađivač: Stručna služba za poslove Općinskog vijeća

Izjavitelj: Muamer Mandra, predsjednik Komisije

U diskusiji je učestvovao: Semir Mušija.

**Semir Mušija:** je rekao da predlagač nije uz prijedloge rješenja dostavio informacije o kandidatima, te je postavio pitanje da li su predložena imenovanja izvršena u skladu s Zakonom o ministraskim, vladinim i drugim imenovanjima. Također je ponovio da smatra da predložena imenovanja nisu usklađena sa Zakonom o javnim ustanovama.

Nakon diskusije Vijeće je usvojilo Rješenje o konačnom imenovanju Upravnog odbora JU Centar za socijalni rad Kakanj sa 18 glasova za, 7 protiv i 1 uzdržan.

## **8. Tačka**

### **Prijedlog rješenja o konačnom imenovanju Nadzornog odbora JU Centar za socijalni rad Kakanj**

Predlagač: Komisija za izbor u regulirane organe

Obrađivač: Stručna služba za poslove Općinskog vijeća

Izjavitelj: Muamer Mandra, predsjednik Komisije

Vijeće je bez diskusije usvojilo Rješenje o konačnom imenovanju Nadzornog odbora JU Centar za socijalni rad Kakanj sa 18 glasova za, 7 protiv i 1 uzdržan.

## **9. Tačka**

### **Izbor vršioca dužnosti općinskog načelnika**

Predlagatelj: Komisija za izbor i imenovanja

Izjavitelj: Edin Aliefendić, predsjednik Komisije

Predsjedavajući je napomenuo sve prisutne da je aktuelni općinski načelnik izabran u Parlamentarnu skupštinu BiH na posljednjim Općim izborima i da će prihvatiti mandat, te je s toga neophodno da Vijeće imenuje vršioca dužnosti općinskog načelnika do provođenja prijevremenih izbora.

**Nermin Mandra:** je rekao da se zahvaljuje svima za uspješnu saradnju, da ovaj i prethodni saziv Općinskog vijeća mogu poslužiti kao primjer općeg, zajedničkog i čvrstog zalaganja za dobrobit lokalne zajednice. Još je rekao da su poseban doprinos u općem napretku Kaknja dale sve političke stranke, nevladine organizacije, udruženja građana, javna preduzeća i javne ustanove, sportski klubovi, aktivisti u mjesnim zajednicama i brojni drugi akteri koji su opći interes stavili iznad svega. Naš zajednički uspjeh ogleda se u tome da se kakanjska lokalna zajednica danas izdiže iznad prosjeka malih gradova, a posebno raduje činjenica da u brojnim segmentima društvenog aktivizma uspijevamo parirati i često biti bolji i od puno većih i bogatijih sredina. O tome svjedoče izvještaji medija čije je sjedište van Kaknja, a koji govore o našim pozitivnim trendovima u poduzetništvu, o našim inovativnim projektima u domeni obnove i izgradnje infrastrukture, o našim kulturnim radnicima, inovatorima, muzičarima i sportistima. Lijepa je spoznaja da nas ljudi promatraju s velikim poštovanjem upravo zbog naših dobrih rezultata. Od brojnih pozitivnih procesa koje smo zajedno pokrenuli posebno treba akcentirati buđenje poduzetničke svijesti kod građana, rast izdvajanja za podsticaje u poduzetništvu i poljoprivredi, te brojne pogodnosti za investicije. Veliki uspjeh je i poduzetnička zona „Vrtlište“ koja je prije nekoliko godina bila pusti prostor. Međutim, sve ovo nije dovoljno. Potrebno je još više rada i još više inovativnih pristupa u oblasti poduzetništva kako bi došlo do novog zapošljavanja u privredi, u poduzetništvu, te u oblasti poljoprivrede. Nadam se da će, ukoliko dođe do ugrožavanja prihoda naše lokalne zajednice i dalje postojati visok stepen saglasnosti u Općinskom vijeću i dalje prema višim nivoima vlasti, da se ne dozvoli oduzimanje onoga što nismo kao općina uspjeli ostvariti više od 50 godina. Želim vam puno uspjeha u budućem radu, a građanima zahvaljujem za povjerenje koje su mi ukazali, te im upućujem želje za dobrim zdravljem i uspjehom.

Usljedila je pauza u radu Vijeća.

**Edin Aliefendić:** je rekao da Komisija predlaže Aldina Šljivu za vršioca dužnosti općinskog načelnika. Također, rekao je da je Komisija imala dva kandidata Eldina Mijoča i Aldina Šljivu, te da se odlučila Vijeću predložiti Aldina Šljivu.

Vijeće je za vršioca dužnosti izabralo Aldina Šljivu sa 17 glasova za, 3 protiv i 6 uzdržanih. Aldin Šljivo se zatim obratio prisutnima.

**Aldin Šljivo:** se zahvalio na ukazanom povjerenju na izboru na vršioca dužnosti općinskog načelnika i istakao da se nada da će svi doprinijeti da se u budućem radu konkretno i kvalitetno vodi diskusija u Vijeću, a za dobrobit lokalne zajednice. Rekao je da će nastojati biti općinski načelnik svih građana općine Kakanj i da se nada nastavku pozitivnih trendova kojim Kakanj korača. Još je rekao da će insistirati na aktivnom učešću svih subjekata u lokalnoj zajednici u cilju postizanja zajedničkog uspjeha.

Predsjedavajući je zaključio rad 24. sjednice Općinskog vijeća u 11:45 sati.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR  
OPĆINSKOG VIJEĆA**  
Ferdo Mijač

**PREDSJEDAVAJUĆI  
OPĆINSKOG VIJEĆA**  
Slaven Katičić